

ILOCANO – “Where is your home?”

SADINO TI PAGTAENGAM?

Kaaduan kadatayo ket addaan ti makuna a pagtaengan. Mabalin a saan a kas kapintas ken kaimbag dagiti dadduma ti pannakaaramidna, ngem isu ket masao nga pagtaengantayo. Sadino man ti papanantayo, segseggaantay latta ti panagsublitayo idia. Uray pay napinpintas ken nasaysayaat dagiti lugar a pagpaspasyarantayo, ad-adda a kailiwatayo ti pagtaengantayo. Adda banag a mangawis kadatayo ket mariknatayo nga idia ti pagtaengantayo.

SANGSANGAILITAYO LAENG DITTOY

Ti Sao ti Dios ibagana nga gangannaet ken agdaldaliasattayo laeng ditoy a lubong. (1 Ped. 2:11; Heb 11:13). Dagiti pagtaengantayo ditoy uray kasano ti kapintas ti pannakaaramidna, saanto nga agnayon. Iti apagbiit a tiempo, dagiti didingna agrukop, ti atepna agubo, ti ridaw ken tawana mangrugi a madadael, no umay ti napigsa nga angin ket agin-inuten a mapukaw.



Awan patakder nga agpaut ditoy lubong, para laeng iti apagbiit a tiempo. Kitaem ti aglawlaw ket mapaneknekam nga amin a banag ditoy lubong ket agpatingga, uray pay ti pagtaengantayo.

DATAYO AMIN ADDA AGNANAYON A PAGTAENGANNA

Ammotay man wenno saan, adda agnanayon a lugar a pagtaengantayo. Mapantayo idia ton panawantayo daytoy a biag, inton ti bagitayo ket addan iti tanem. Dagiti kararuatayo mapanto iti lugar nga idia saanton nga gangannaet, agnanayonton idia. Ti maysa a pagyanan ket nailadawan nga danaw nga apuy ken asufre. Adda idia dagiti saan a pudno a profeta, ket ti diablo maitappuakto idia ken isuamin a tao a saan a masarakan ti naganna iti Libro ti Biag. (Apoc. 20:10-15). Ito daytoy a gumilgilayab nga apuy, lugar ti tuok ken pudot, addanto panagsangit ken, panagngaretnget ti ngipen. Ti makaaliaw a langa ti diablo ken katkatawa dagiti demonyo, mainayonto iti nakabutbuteng a pasamak idia. Awanto ti mangliwiwa ken makabalin a tumulong idia. Dagiti madusa, is-isudanto nga agitured ti rigat ken tuok. Agbabawidanto ta saanda nga impangag ti Naimbag nga Damag ni Jesu-Kristo. Daytoy nga apuy ken lugar ti tuok, ti impiyerno, ti agnanayon a pagyananda, "Ta nagbasolda amin ket adayoda ti panangisalakana ti Dios". (Roma 3:23). Addanto ditoy dagiti manna-ki-abig, immoral, agdaydayaw ti didiosen, mangkukulam, natangsit, naimon, ulbod, mammartek, manangallilaw, suitik, mammapatay, mannakiriri, sadut, napalangguad, nauyong, naagum, ken ti agayat ti lubong, ken banbanag nga adda ditoy lubong. (Gal. 5:19-21; Apoc. 21:8). Ditoy ti pagyanan dagiti saan nga nangawat ken Jesus a Mangisalakana, dagiti saan nga nadalusan babaen ti Darana. "Dikay koma maallilaw, saan a marabrabak ti Dios, aniaman nga imula ti maysa a tao apitennanto." (Galatia 6:7). Aniaman nga imulatayo a basol ken aramid ti kinatao, apitentayto idia impiyerno.

Panunutem ngarud no kasano ti ipapan ti managbasol a tao gapu ta saanna nga inawat ti Mangisalakana. Ti napeklan a managbasol umadani ti patay a sipupunno ti bagina iti ut-ot, ken ti kararuana, ti buteng kenni Patay. Ni Patay umay iti oras nga saan nga ammo ken saan nga mapakpakadaan. Nakabutbuteng ti panagkitana ti tao nga alaenna. Ti ragsak nga inted ti basol, napukawen, ket ti nakabutbuteng ken dakkal a supapak ti basol masapul a bayadanna. (Roma 6:23). Ti kaawan ti namnama a kasasaad iti impiyerno isu't mangtengtengngel ti kararuana ken espiritu. Uray kayatna ti dumawat ti tulong, saanna a mabalina ti umawag iti Dios. Dagiti gagayyemna saanda a makaasideg ta awan mabalinda nga itulong ken pangliwiwa kenkuana. Uray pay adu ti kinabaknangna a naalana babaen iti sinusuitik a wagas, saanna a mabalina nga isalakana ti kararuana, dina met maikkat ti ut-ot a mariknana, dina met mabalina a paatiddogen ti biagna. Uray kayatna a panunoten ti Dios, adda ti diablo nga manglapped kenkuana. Isuamin nga inay-ayat ken nagbibiganna ditoy lubong kasla isun ti manglalais kenkuana; kasta met dagiti asideg kenkuana ditoy lubong, saandan a makatulong kenkuana. Mapanunotan a nakabutbuteng ti

pagbanagan ti tao a matnag iti ima ti sibibiag a Dios. (Heb. 10:31). Namnamaenna idi nga umasideg to iti Dios inton dandanin matay ngem naladaw gayamen. Rinibu dagiti tao nga matay a saanda a mapakpakadaan ket awanen gundawayda nga umawag iti Dios. Isu't gapuna nga umasidegtayo kenkuana ita ta adda pay gundaway. (Isa 55:6). Mangngegna koma ti makaliwiwa a Sao ti Dios, ngem daytoy a managbasol a saan a nangawat iti parabor ken ayat ti Dios iti unos ti panagbiagna, mangngegnan ti timek ti Nalinteg nga Ukom, ti Mangisalakan a saanna nga inawat, a kunkunana, "Pumanawkayo ditoy sangoanak dakayo a nailunod, inkayo iti agnanayon nga apuy a naisagana para iti diablo ken dagiti pasurotna." (Mat. 25:41). "Amin a tao matay iti mamimpinsan, kalpasanna, ukomen ti Dios." (Hebreo 9:27).

TI NASAYSAYAAT A PAGTAENGAN

Iti daytoy a lugar, awan ti rabii, awan met ti silaw ken lawag ti init ta saanen a kasapulan gapu ta addanto ti Apo idiy. (Apoc. 22:5). Awan pay nakakita wenko nakanggeg, awan pay nakapanunot kadagiti banbanag nga insagana ti Dios para kadagidiay agayat Kenkuana. (1 Cor. 2:9). Awan sao ditoy lubong a makabalin a mangiladawan ti dayag ti Langit, napintas ken nakaskasdaaw a lugar. Daytoy ti pagyanan dagiti nasubbot. Awan managbasol ken saan nga nadalus a makastrek idiy, kasta met dagiti agaramid iti nakababain ken ti agsao ti ulbod, dagitinto laeng naisurat ti naganna iti Libro ti Biag a kukua ti Kordero ti sumbrek ti ciudad. (Apoc. 21:27). Saan a mabalin a gatangen wenko maitrabahoan daytoy a lugar. Saan met a makalay-at dagiti didingna ken saan a magun-odan babaen ti adu a seremonya ti simbaan. Adda maymaysa a dalan, ni Jesus. Kunana, "Siak ti Dalan, ti Pudno, ken ti Biag, awan ti makapan iti Ama no saan a magna Kaniak." (Juan 14:6). Imbaga pay ni Jesus iti Juan 14:2 ti kasasaad ti lugar nga insaganana. Ngem daytoy a lugar para laeng kadagiti napakawan ti basolna, ti puso ken biagna ket nadalus. Adu a tao ti agkawes iti nadumaduma a kita ta kayatda ti makastrek idiy. Ngem saan, ti puso laeng ti masapul a nadalus ken panagbiagtayo a nasantoan, saan ketdi nga kas kadagiti dakes nga adda ditoy lubong ti ar-aramidentayo.

Makitatayo ngarud a nagbasoltayo iti Dios ket madusatayto idiy impiyerno, adda laeng maysa a banag nga masapul nga aramidentayo, ipakawantayo dagiti basbasoltayo iti Dios. Isu nalinteg ket aramidenna ti inkarina; pakawanenna dagiti basbasoltayo ket dalusannatayo iti amin a kinadakestayo. (1 Juan 1:9). Kuna ni Jesus, "Siak ti panagungar ken ti Biag, siasinno man a mamati Kaniak, uray no matay, agbiagto pay." (Juan 11:25-26). "Siasinoman a dumngeg ti Saok, ket mamati iti nangibaon Kaniak, adda biagna nga agnanayon. Saanton a maukom, ngem mainpud iti patay, mapan iti biag." (Juan 5:24). Ti patay saan a makaited ti buteng kadagiti Kristiano. Ti patay nadadelen, addan naan-anay a panagballigi! Sadino o patay, ti yan ti balligim? Sadino patay ti pannakabalinmo a mangdadael? Madaydayaw koma ti Dios a nangted ti balligi babaen ken Jesu-Kristo."

(1 Cor. 15:54-57). Ti tao a nagbiag ken nakipagna iti Dios awan butengna iti patay. Ton umay ti tiempo a pumanaw, maysanto a kita ti ragsak, kas kuna ni Apostol Pablo, “kaykayatko ti sumina iti daytoy a biag ket innak ken Kristo – nasaysayaat daytoy kaniak.” (Fil. 1:23). Ti maysa a pudno a Kristiano, kayatna a kitaen ti rupa ni Jesus a natay iti Krus gapu kenkuana. Ken ti Espiritu Santo ipalagipna kenkuana ti Sao ni Jesus; “Saankayo a madanagan ken mariribukan, mamatikayo iti Dios, mamatikayo met Kaniak. Adda adu a pagyanan iti balay ni Amak, ket innak mangisagana ti pagyananyo. Diak koma imbaga daytoy kadakayo no saan a pudno. Kalpasan ti ipapanko panangisagana ti pagyananyo, umay kayto alaen tapno adda kayo met iti yanko. Ammoyo ti dalan nga agturong iti papanak.” (Juan 14:1-4).

Agsardengtayo iti apagbiit ta kitaentayo no kasano ti ipapan ti Kristiano iti pagtaenganna. Imbes nga agturong iti patay, saan, agsipud ta ti anghel ti Dios agur-uray tapno alaenna. Ti kararua ken espirituna sumina iti bagina, ket agturong idiy langit a yan ti Apo a natay gapu kenkuana. Adda ragsak nga agur-uray kenkuana sadiay. Kuna ti Apona iti naragsak a kablaaw: “Nasayaat ti inaramidmo, mapagtalkan ken naimbag nga adipen, umayka, makipagrag sakka kaniak.” (Mat. 25:21). Awanen ti pannakabalin pay ni satanas kenkuana,” ta nagasat dagiti matay gapu iti panagserbida iti Apo, aginanadan kadagiti nadagsen a trabahoda ket kumuykuyog kadakuada ti bunga ti panagserbida. (Apoc. 14:13). Aramidem ngarud ita, kas iti anak a naiyaw-awan, adayo ti naturongna, nakitana ti dakes a biagna, ken ti panagkasapulanna ket kunana: “Tumakderak ket agsubliak ken Amak.” (Lukas 15:18). Isukom ti biagmo ken Jesus, aramidem sadino man ti yanmo, agparintumengka ket ipakawanmo dagiti basbasolmo iti Dios, dawatem nga dalusannak babaen ti Napateg a Darana. Awatem isuna iti biagmo. Iti panangaramidmo iti daytoy, tallikudamon ni satanas, ken iti dalan nga agturong iti impiyerno ket rugiamon ti magna nga agturong iti naiiangitan a pagtaengan. Aramidem koma daytoy ita.

M.R. Gschwend.

If you have found salvation in Christ, or have been otherwise blessed through our Gospel literature, please let us know. We would like to thank God with you, and remember you further in our prayers.

Our Heart of Man Book can now be downloaded in 480 different languages onto cell phones, tablets, etc from our website www.angp-hb.co.za.

For **free** Gospel literature, books and tracts in over 540 languages, write to:

E-MAIL: info@angp.co.za

**ALL NATIONS GOSPEL PUBLISHERS
P.O. Box 2191, PRETORIA, 0001, R.S.A.**

(A Gospel Literature Mission financed by donations)

(Reg. No. 1961/001798/08)